

# I buffa in vent criv

Schurnalistas e schurnalists grischuns èn confruntads cun intschertezzas

DAD ANDREAS CADONAU / ANR

■ **Entaifer schurnalistas e schurnalists grischuns regia actualmain dablara malsegirtad. Emploiads da las medias publicas guardan cun atenziun vers la votaziuns dals 4 da mars ed ils collegas da las medias privatas da print èn inquietads pervi da l'uniun da las redacziuns da la «Südostschweiz» cun il «Bündner Tagblatt».**

La davosa retschertga pertutgant ils resultats da votaziun dals 4 da mars po bain quietar in pau emploiadas ed emploiads da las media publicas e privatas da radio e televisiun. La votaziun è dentant pir decida enaquella ch'il resultat da votaziun è sin maisa, uschia che la proxima emna resta anc ina tscherta intschertezza davart il futur professiunal. E gist quella malsegirezza regia momentan medemamain tar schurnalistas e schurnalists da las medias grondas da print dal Grischun. La Somedia ha annunzia dad unir las duas redacziuns da la «Südostschweiz» e dal «Bündner Tagblatt» cun reducir personal. Las discussiuns tranter schurnalistas e schurnalists dad SO e BT a l'ur da conferenzas da medias tematiseschon actualmain l'agen futur professiunal. «Pos ti star, stos ti ir, stos ti reducir il pensum u midar partiziun?» Per il docent da medias a la HTW da Cuir, *Matthias Künzler*, n'èn las restructuraziuns entaifer la chasa da medias da Cuir betg exnum ina surpraisa. Künzler ha menziunà la gronda pressiuin che regia principalmain tar la sparta da print che haja pers ils davos onns enfin 60 procent dal volumen d'inserats. «Quel process n'è anc betg terminà.» Consequentmain sajan tuttas chasas da medias londervi da tschertgar collavuraziuns per ulivar las massivas perditas finanzialas. Il docent da medias ha fatg attent a la collavuraziun instradada tranter la chasa editura AZ da la Argovia cun la NZZ da Turitg. En consequenza da quella collavuraziun saja la Somedia sco la pitschna da las chasas edituras grondas isolada e persula. Tant pli ch'ina collavuraziun cun la BaZ da Basilea na saja, pli probabel per motivs politics, betg vegnida a strada.



Las funtaunas da novitads èn sut pressiuin e pertutgada da restructuraziuns n'è betg sulet l'Agentura da novitads svizra.

FOTO A. CADONAU

## Tanschi u tanschi betg?

Consequentmain, uschia il scienzià da medias, stoppia la Somedia restructurar intern. La dumonda futura è dentant sche quella restructuraziun interna tanscha per sa mantegnair a lunga vista. Causa ch'i na tanscha betg resta anc adina la BaZ da Basilea per ina collavuraziun pli stretga cun la Somedia. Ils fils tranter BaZ e Somedia existan. Bain edescha la Somedia il Tagblatt, la gasetta appartegn dentant a la Bündner Tagblatt Verlags SA. President dal cussegl d'administraziun è il secretari general da la Ems Chemie SA, *Conrad Gericke*, e sco sulet commember dal cussegl segna *Silvio Lebrument*. Dumondas pertutgant strategias futuras ha Gericke respundi cun la remarka ch'il concept detaglià co las duas redacziuns vegnian manadas vinavant na saja anc betg avant maun uschia che la Ems Chemie na sappia anc betg prender posiziun. El ha confermà ch'ils dretgs d'ediziun dal «Bündner Tagblatt» sajan

maioritar en possess da la Ems Chemie SA. Atmosfera da crisa regia medemamain tranter schurnalistas e schurnalists da la Agentura da novitads svizra, la SDA. Uffizialmain na vulan schurnalistas e schurnalists sa chapescha betg s'exprimer. Ma els discurran dad in miserabel clima da lavur en ina atmosfera tisientada entaifer l'interpresa. Andetgmain ha la SDA, ina societad acciunara purtada dals editurs svizzers, annunzià da reducir ina quarta dal personal da 150 personas. Per schurnalistas e schurnalists da la SDA è la restructuraziun radicala vegnida tut surura. La sedia da la SDA a Cuir, responsabla per ils chantuns Glaruna e Grischun ed il Principadi da Liechtenstein, è medemamain pertutgada. Bain vegn il volumen da lavur da la sedia da la SDA a Cuir reduci sulet da 160 sin 140 procent. In collavuratur sur 60 onns è vegni relaschà cun la perspectiva sin pensiun anticipada. Vul dir, almain dus onns e mez ir a bullar.

## Surpris da la restructuraziun

Surpris da la restructuraziun radicala tar la SDA è er il docent da medias. Matthias Künzler è persuadi ch'il servetsch da la Agentura da novitads svizra saja impurtant gist perquai che las medias reduce schian las prestaziuns da las atgnas redacziuns per spargnar. Quai tant pli che la politica haja signalisà dad alimentar la SDA cun daners publics e ch'ils editurs sajan per part prontos dad acceptar ina promoziun statala mediala via la Agentura da novitads svizra. Uschiglio veglian els renunziar ad intervenziuns statalas, ha Künzler fatg attent. Da restructuraziuns e midadas da perspectives professiunalas n'èn era schurnalistas e schurnalists da la Agentura da novitas ruman-tscha ed LQ betg privads. Dentant èn els gia suttamess dapi l'entschatta avant 20 onns a cuntinuadas midadas e restructuraziuns. E per far curaschi a las ulteriuras collegas da la branscha: Els scrivon anc adina.